



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTRZ 0018393 19

Datum: 12.01.2022. godine

Sudu Bosne i Hercegovine
Sudiji za prethodno saslušanje

Na osnovu člana 35. stav 2. tačka i), člana 226. stav 1. i člana 227. stav 1. Zakona o krivičnom postupku Bosne i Hercegovine (ZKP BiH) podižem

Optužnicu

Protiv:

Samardžija Zdravko, [REDACTED] rođen 08.02.1954. godine u Sanskom Mostu, [REDACTED]

Što je:

Za vrijeme oružanog sukoba u Bosni i Hercegovini, u okviru širokog i sistematičnog napada Vojske srpske Republike Bosne i Hercegovine, odnosno Republike Srpske (VRS) i snaga Ministarstva unutrašnjih poslova srpske Republike Bosne i Hercegovine, odnosno Republike Srpske (MUP RS), koji je trajao od 11.06.1992. godine pa do sredine 1994. godine, usmjerenog protiv civilnog stanovništva bošnjačke i hrvatske nacionalnosti koje je živjelo na području opštine Kotor Varoš, znajući za taj napad i da njegove radnje čine dio tog napada, učestvovao u **udruženom zločinačkom poduhvatu** čiji su učesnici bili i **Samardžija Zdravko** u svojstvu člana komande Specijalnog odreda milicije CSB Banja Luka, komandujući na terenu ovim Odredom zajedno sa [REDACTED] kao komadant 22. Lpbr. VRS a od 23.10. do 31.12.1992. godine kao komadant Taktičke grupe 3 VRS, [REDACTED] kao komadant 2. Bataljona 22. Lpbr. VRS, a od juna 1993. godine kao načelnik štaba 22. Lpbr. VRS, [REDACTED] kao komandir I čete 2. bataljona 22. Lpbr. VRS i ranije de facto a od 14.07.1992. godine i formalno zamjenik komandanta istog bataljona, [REDACTED] kao komadant Teritorijalne odbrane (TO) Kotor Varoš, istovremeno od 25.06.1992. godine i kao komadant Odbrane grada Kotor Varoš, a od sredine jula 1992. godine kao komadant, a potom od sredine augusta 1992. godine kao načelnik štaba 1. Lake Kotorvaroške brigade VRS-a do 01.12.1992. godine, te ujedno i kao član Kriznog štaba, a kasnije Ratnog predsjedništva opštine Kotor Varoš, [REDACTED] u svojstvu komandanta 22. Lpbr. VRS počev od 23.10.1992. godine, [REDACTED] kao predsjednik opštine Kotor Varoš i predsjednik Kriznog Štaba a kasnije Ratnog predsjedništva Opštine Kotor Varoš, [REDACTED] u svojstvu komandanta 1. Lake Kotorvaroške brigade VRS [REDACTED] u svojstvu inspektora Službe Državne Bezbjednosti MUP-a RS-a [REDACTED] u svojstvu

načelnika Stanice Javne Bezbjednosti (SJB) Kotor Varoš, [REDACTED] u svojstvu komandira Policijske stanice (PS) Kotor Varoš i ostalo civilno, policijsko i vojno rukovostvo SAO Krajine i I. Krajiškog Korpusa, uključujući [REDACTED] – načelnika Centra službi bezbjednosti Banja Luka, sa **zajedničkim ciljem** da sa teritorije opštine Kotor Varoš trajno uklone bošnjačko i hrvatsko stanovništvo koje je tu živjelo vršenjem njihovog progona na nacionalnoj i vjerskoj osnovi, pa su radi realizacije ovog cilja kojeg su trebale provesti vojska i policija u saradnji sa civilnim organima vlasti, počinili progon bošnjačkog i hrvatskog civilnog stanovništva na području opštine Kotor Varoš zatvaranjem ili drugim teškim oduzimanjem fizičke slobode suprotno osnovnim pravilima međunarodnog prava, mučenjem, silovanjem, drugim nečovječnim djelima slične prirode učenjenim u namjeri nanošenja velike patnje ili ozbiljne fizičke ili psihičke povrede ili narušenja zdravlja, ubistvima, deportacijom i prisilnim preseljenjem stanovništva, protupravnim, samovoljnim i vojnim potrebama neopravdanim uništavanjem imovine u velikim razmjerama, te uništavanjem kulturnih, historijskih i religijskih spomenika, **Samardžija Zdravko** djelujući individualno i u dogovoru sa ostalim učesnicima udruženog zločinačkog poduhvata i sa njemu podređenim pripadnicima Specijalnog odreda milicije, učestvovao u progonu, pa su tako:

1. Dana 11.06.1992. godine, u jutarnjim satima i tokom cijelog dana, u užem dijelu Kotor Varoši, prigradskim naseljima i selima, pripadnici Specijalnog odreda milicije CSB Banja Luka, pripadnici 2. bataljona 22. Lpbr. VRS i pripadnici TO Kotor Varoš:
 - a. nezakonito su lišili slobode oko 150 civila bošnjačke i hrvatske nacionalnosti, među kojima i [REDACTED] i druge civile, te su sve zarobljene civile doveli u krug pilane „Drvoprerada“ koja se nalazi u užem dijelu grada, gdje su neke od njih držali zatočene do 12.06.1992. godine, a zatim su u prostorije SJB Kotor Varoš i u prostorije Osnovne škole u Maslovarama odvedeni i zatvoreni pojedini civili, a među njima i [REDACTED];
 - b. prilikom lišenja slobode ovih oko 150 lica nesrpske nacionalnosti, pripadnici Specijalnog odreda milicije CSB Banja Luka fizički su zlostavljali [REDACTED] kao i brojne druge civile, pri čemu su za vrijeme dok su ih držali zatočene u restoranu i dvorištu pilane, pripadnici navedenih jedinica nečovječno postupali prema [REDACTED] i drugim civilima, udarajući ih po cijelom tijelu puškama i drugim predmetima, uzrokujući im na taj način velike fizičke i psihičke patnje,
2. Dana 11.06.1992. godine, prilikom akcije vojnih i policijskih snaga VRS-a na području Kotor Varoši i nezakonitog lišavanja slobode i pritvaranja više desetina civila bošnjačke i hrvatske nacionalnosti, pripadnici Specijalnog odreda milicije CSB Banja Luka su upali naoružani u kuću [REDACTED], u neposrednoj blizini Doma zdravlja u Kotor Varoši, kojeg su u donjem vešu istjerali iz kuće, naredili mu da se prisloni uza zid kuće licem okrenutim prema zidu, sa rukama podignutim uvis tako da drži podignuta tri prsta, nakon čega su ga utjerali u garažu kako bi im otvorio gepek od svog automobila, prilikom čega je jedan od pripadnika ove jedinice nogom obuvenom u vojničku čizmu, više puta udario [REDACTED] u predjelu leđa i slabina;

3. Od 11.06.1992. godine, pa do kraja jula 1992. godine, u užem dijelu grada Kotor Varoši, pripadnici Specijalnog odreda milicije CSB Banja Luka i pripadnici 22. Lpbr. i TO Kotor Varoš su:
- od ranih jutarnjih sati nezakonito lišavali slobode civile nesrpske nacionalnosti i zatvarali ih u pritvorske jedinice i službene prostorije SJB Kotor Varoš, na koji način je lišeno slobode desetine civila, a među njima i [REDACTED] i druga lica;
 - koja zarobljena lica su pripadnici Specijalnog odreda milicije CSB Banja Luka, i pripadnici redovnog i rezervnog sastava policije SJB Kotor Varoš kao i TO Kotor Varoš, svakodnevno udarali po cijelom tijelu kundacima pušaka, policijskim palicama, rukama i nogama, drugim predmetima, tjerali su zatvorenike da se u hodniku zgrade policijske stanice prislone uza zid licem okrenutim prema zidu, sa rukama podignutim uvis držeći podignuta tri prsta, istovremeno su ih udarali u predjelu glave i leđa da bi od silnih udaraca zatvorenici padali na pod, pa su ih opet podizali i nastavljali udarati na isti način prouzrokujući im snažne fizičke i psihičke bolove;
 - pri tome su pojedine zatvorenike prisiljavali da se međusobno siluju, pa su tako prisilili [REDACTED] da vrši oralne radnje nad zatvorenicima među kojima i nad [REDACTED], a potom su prisilili [REDACTED] da izvrši oralnu radnju nad [REDACTED] te da istu siluje, što [REDACTED] nije bio sposoban učiniti, prisiljavali su [REDACTED] da siluje [REDACTED], potom su prisilili [REDACTED], koji su bliski srodnici, da međusobno izvrše oralne radnje, prisilili su [REDACTED] da međusobno izvrše oralne radnje;
4. Dana 11.06.1992. godine pripadnici 2. bataljona 22. Lpbr. i TO Kotor Varoš, zajedno sa pripadnicima Specijalnog odreda milicije CSB Banja Luka, u okviru napada koji je trajao do 15.06.1992. godine, ušli su u selo Hrvaćani - općina Kotor Varoš, gdje su tom prilikom ubili osam (8) civila bošnjačke nacionalnosti starije životne dobi i to: [REDACTED], a ranjen je [REDACTED], dok su mještani sela Hrvaćani, među kojima su bili [REDACTED] i drugi, usljed napada pobjegli na područje sela Plitska, općina Kotor Varoš, nakon čega su zapalili kuće vlasništvo [REDACTED] i druge kuće;
5. Dana 13.06.1992. godine, pripadnici Specijalnog odreda milicije CSB Banja Luka te pripadnici 2. bataljona 22. Lpbr. i TO, su izvršili pješadijski napad na selo Orahova - općina Kotor Varoš, prilikom kojeg napada su ubili civila [REDACTED], te ranili [REDACTED] i jednu djevojku neutvrđenog identiteta, a zatim nezakonito lišili slobode [REDACTED] i zatvorili ga u učionicu Osnovne škole u Maslovarama, nakon čega je odvezen u policijsku stanicu

u Kotor Varoši gdje ga je preuzeo **Samardžija Zdravko** i zajedno sa [REDACTED] zavezane odveo u Banja Luku na ispitivanje, gdje ih je predao dvojici inspektora u prostorijama CSB Banja Luka koji su ih zatim ispitivali i pretukli, nakon čega ih je **Samardžija Zdravko** obojicu odveo nazad pred Policijsku stanicu u Kotor Varoši, a zatim ih odveo do zgrade zatvora iza zgrade suda te ih predao čuvarima gdje su zatim nezakonito držani i tučeni nekoliko mjeseci;

6. Dana 17.06.1992. godine, užem dijelu grada Kotor Varoš, pripadnici Specijalnog odreda milicije CSB Banja Luka:
 - a. su došli do kuće vlasništvo [REDACTED], u blizini kuće i u dvorištu kuće su nezakonito lišili slobode civile [REDACTED] te ih odveli i zatvorili u jedan magacin u sklopu „Kožare“ u Kotor Varošu, a gdje su već prethodno, od strane pripadnika Specijalnog odreda milicije CSB Banja Luka držani zatvoreni civili [REDACTED], a zatim su [REDACTED] odveli i zatvorili u prostorije sportske dvorane OŠ „24. april“ u Kotor Varoši;
 - b. pripadnici Specijalnog odreda milicije CSB Banja Luka su tom prilikom nečovječno postupali prema civilima [REDACTED] udarajući ih po cijelom tijelu, a od [REDACTED] su oduzeli 1.000 DEM koje je imao kod sebe, nakon čega su [REDACTED] pustili na slobodu, ali su ga prethodno prisilili da prođe kroz „špalir“ pripadnika Specijalnog odreda milicije CSB Banja Luka koji su ga udarali po cijelom tijelu nogama i palicama, usljed čega je trpio snažne fizičke bolove;
7. Tačno neutvrđenog dana tokom juna 1992. godine, pripadnici Specijalnog odreda milicije CSB Banja Luka i drugi pripadnici VRS su na području naselja Kotorište - općina Kotor Varoš, nezakonito lišili slobode civila [REDACTED] koji je prilikom lišenja slobode u svom naručju držao dvogodišnju kćerku, kojem su pripadnici Specijalnog odreda milicije CSB Banja Luka oduzeli kćerku iz ruku i bacili na zemlju, što je kod njega izazvalo psihičku patnju, a potom su njega i civile [REDACTED] i druge civile naselja Kotorište, doveli i postrojili na lokalitet tzv. „Križ“, gdje su prema njima nečovječno postupali gađajući ih „ciglom“, na koji način su „ciglom“ pogodili [REDACTED] u predio glave, a od siline udarca je [REDACTED] pao na zemlju, trpeći fizičke bolove;
8. Dana 23/24.06.1992. godine, pripadnici Specijalnog odreda milicije CSB Banja Luka u sadejstvu sa pripadnicima 2. bataljona 22. Lpbr. VRS, te pripadnici TO Kotor Varoš, izvršili su tenkovski, zatim i pješadijski napad na selo Bilice - općina Kotor Varoš, u kojem je bilo nastanjeno stanovništvo hrvatske nacionalnosti, te su zauzeli selo i ubili 11 civila mještana sela hrvatske nacionalnosti, i to: [REDACTED]
[REDACTED], a [REDACTED] su ranili u desnu ruku i butinu, nakon čega su radi zastrašivanja [REDACTED] udarali po cijelom tijelu, a potom ga i lišili slobode te su ga povelili prema gradu, kojom prilikom su [REDACTED] vezali štrik oko vrata poput „omče“, a drugi kraj ovog štrika je držao pripadnik Specijalnog odreda milicije CSB Banja Luka koji je upravljao motornim vozilom a [REDACTED] je morao trčati za vozilom kojom prilikom je stalno padao i ustajao, a povremeno vukući se po cesti, trpeći usljed toga velike fizičke i psihičke bolove, na koji način je doveden a potom i zatvoren u jednu od službenih prostorija SJB Kotor Varoš;

9. Dana 25.06.1992. godine pripadnici Specijalnog odreda milicije CSB Banja Luka zajedno sa pripadnicima SJB Kotor Varoš i pripadnicima 2. bataljona 22. Lpbr. VRS i TO Kotor Varoš, ušli su u prigradska naselja Kotor i Kukavice - općina Kotor Varoš, nakon čega su:
- a. pod prijetnjom upotrebe vatrenog oružja istjerali civile bošnjačke i hrvatske nacionalnosti iz njihovih kuća, tako što su išli od kuće do kuće, izvodili civile iz kuća, odvajali muškarce od žena i djece, i nezakonito lišili slobode najmanje 68 civila, koje su okupili u dvorištu ispred kuće [REDACTED], i to [REDACTED]

[REDACTED] i druga lica bošnjačke i hrvatske nacionalnosti, su istog dana poslije 17,00 sati, odveli i zatvorili u zatvor koji se nalazio iza zgrade Osnovnog suda u Kotor Varoši;

- b. U Kukavicama je jedan pripadnik Specijalnog odreda milicije CSB Banja Luka naredio da se zapale sve kuće Bošnjaka i Hrvata te da su srpske kuće označene i da se ne diraju, pa su tako pripadnici Specijalnog odreda milicije CSB Banja Luka i vojnici zapalili kuće vlasništvo [REDACTED]

[REDACTED] i dr.;

- c. nakon što su pripadnici Specijalnog odreda milicije CSB Banja Luka nezakonito lišili slobode i držali zatočene civile ispred kuće [REDACTED], iz grupe zarobljenih civila, nakon što je pripadnik Specijalnog odreda milicije CSB Banja Luka [REDACTED] naredio da se izdvoji pet civila i strijelja, izdvojili su [REDACTED], a zatim su ih pripadnici Specijalnog odreda milicije CSB Banja Luka odveli do susjedne kuće [REDACTED], nakon čega su pucajući iz vatrenog oružja ubili, a zatim su naredili [REDACTED] da utovare tijela ubijenih u kombi, nakon čega su pripadnici Specijalnog odreda milicije CSB Banja Luka ubili iz vatrenog oružja [REDACTED], nakon čega je jedan pripadnik Specijalnog odreda milicije CSB Banja Luka iz naručja [REDACTED] uzeo njegovo dijete, bacio ga, a potom su izveli [REDACTED] i odveli iza kuće [REDACTED] gdje su ga i ubili;
- d. preostale žive zarobljene civile Bošnjačke i Hrvatske nacionalnosti pripadnici Specijalnog odreda milicije CSB Banja Luka povelili su u pravcu središta grada te ih doveli do bivše željezničke pruge odnosno do kuće [REDACTED], a potom im naredili da u dvije kolone krenu prema Domu zdravlja Kotor Varoš na kojem putu su bili više civila, tako što su pripadnici Specijalnog odreda milicije CSB Banja Luka ubili [REDACTED]

- [redacted], a u blizini mosta ubili su [redacted], a zatim su pripadnici Specijalnog odreda milicije CSB Banja Luka uz ogradu dvorišta [redacted] u blizini kuće [redacted] ubili [redacted], a sa druge strane puta u istom mjestu ubili [redacted] i [redacted], te u ulici Maršala Tita ubili su [redacted] pucajući iz vatrenog oružja, a [redacted] radnik SJB Kotor Varoš, izdvojio je [redacted] i ubio ga;
- e. nakon što su preživjeli civili Bošnjačke i Hrvatske nacionalnosti dovedeni ispred Doma zdravlja, a među njima i [redacted]
- [redacted] i druga lica bošnjačke i hrvatske nacionalnosti, tu su pod prijetnjom oružja držani zatočeni nekoliko sati te fizički i psihički zlostavljani od strane pripadnika Specijalnog odreda milicije CSB Banja Luka i vojnika, i to tako da su prilikom ulaska u krug Doma zdravlja morali proći kroz „špalir“ gdje su ih pripadnici Specijalnog odreda milicije CSB Banja Luka i vojske udarali palicama, rukama, nogama i kundacima, a zatim su im naredili da stanu uz zid zgrade Doma zdravlja, nakon čega su ih udarali po cijelom tijelu palicama, cjepanicama, puškama, nogama, stisnutim pesnicama oko sat vremena usljed čega su civili trpjeli snažnu fizičku i psihičku bol, a potom je jedan od pripadnika ovih jedinica kašikom bagera udario i fizički ozljedio [redacted], nakon čega je NN pripadnik Specijalnog odreda milicije CSB Banja Luka na zarobljene civile pustio psa njemačkog ovčara - vučjaka koji ih je na njegove komande grizao nanoseći im i na taj način snažnu fizičku i psihičku bol, a zatim su ponovo tukli preživjele prilikom ulaska u zatvor koji se nalazio iza zgrade Osnovnog suda u Kotor Varoši, tako što su ih natjerali da prođu kroz „špalir“ kojom prilikom su ih pripadnici Specijalnog odreda milicije CSB Banja Luka i vojske udarali, te su u narednom periodu u zatvor neovlašteno ulazili pripadnici Specijalnog odreda milicije CSB Banja Luka i drugih vojnih i policijskih jedinica koji su ih fizički i psihički zlostavljali
- f. ispred Doma zdravlja pripadnik Specijalnog odreda milicije CSB Banja Luka [redacted] [redacted] izdvojili su [redacted], a potom je [redacted] istom pucao iz pištolja u grudi i glavu te ga ubio, pa je dalje [redacted] ranio u stomak [redacted], a drugi pripadnik Specijalnog odreda milicije CSB Banja Luka ga je ubio rafalom iz automatske puške, te je [redacted] odvojio [redacted] kojeg je zatim ubio [redacted], a uporedo sa ovim ubistvima izvršeno je i streljanje [redacted], a ubijeni je i [redacted], nakon čega je NN pripadnik Specijalnog odreda milicije CSB Banja Luka na zarobljene civile pustio psa njemačkog ovčara - vučjaka koji ih je na njegove komande grizao usljed čega su ubijena četiri (4) civila i to [redacted], a potom su grupu u kojoj su bili [redacted] i dr., natjerali da kopaju grobnicu, nakon čega su ih ubili pripadnici Specijalnog odreda milicije CSB Banja Luka;
- g. ispred Doma zdravlja odvojili su [redacted] i odveli ga u nepoznatom pravcu i od tada mu se gubi svaki trag;

10. Dana 25.06.1992. godine u Kotor Varoši, u poslijepodnevnom satima, četiri pripadnika Specijalnog odreda milicije CSB Banja Luka i 2. bataljona 22. Lpbr VRS su došli do stana vlasništvo [REDACTED], koji je do 11.06.1992. godine bio redovni policajac SJB Kotor Varoš, kojeg su odveli do rijeke Vrbanje, gdje su ga ubili pucanjem iz vatrenog oružja;
11. Dana 25.06.1992. godine, u užem dijelu Kotor Varoša, pripadnici Specijalnog odreda milicije CSB Banja Luka i 2. bataljona 22. Lpbr. VRS su iz porodične kuće vlasništvo [REDACTED] izveli civile [REDACTED], a kasnije su na mostu, na ulazu u naselje Donja Varoš, lišili slobode [REDACTED], pa su svu trojicu odveli na parking u blizini zgrade SJB Kotor Varoš, gdje su ih ubili pucajući iz vatrenog oružja;
12. Dana 25.06.1992. godine, u večernjim satima, u Kotor Varoši, pripadnici Specijalnog odreda milicije CSB Banja Luka i 2. bataljona 22. Lpbr. VRS su:
- iz njihovih kuća istjerali i nezakonito lišli slobode civile nesrpske nacionalnosti [REDACTED], a zatim pod prijetnjom upotrebe vatrenog oružja ih odveli do zgrade SJB Kotor Varoš, nakon čega su ih nezakonito zatvorili u fiskalturnu salu OŠ „24 april“
 - dok su [REDACTED] vodili prema OŠ „24 april“, udarali su ih rukama po cijelom tijelu i otvorenim dlanovima po obrazima, a ispred OŠ „24 april“ im prvo naredili da podignu tri prsta uvis, a potom, oko 30 minuta neprekidno udarali pendrecima, puškama, nogama i stisnutim pesnicama po cijelom tijelu, uzrokujući im snažne fizičke i psihičke bolove;
13. Dana 25.06.1992. godine, u Vrbanjcima, zaseok Donji Vrbanjci - općina Kotor Varoš, pripadnici Specijalnog odreda milicije CSB Banja Luka, zajedno sa pripadnicima 2. Bataljona 22. Lpbr. i TO Kotor Varoš, ušli su u zaselak Donji Vrbanjci gdje su živjeli pripadnici bošnjačke i hrvatske nacionalnosti, a zatim su zapalili kuće vlasništvo [REDACTED] i drugih, a onda su istjerali civile iz njihovih kuća te okupili oko 100 civila muškaraca, žena i djece ispred prodavnice vlasništvo [REDACTED], odakle su ih doveli do benzinske pumpe u Vrbanjcima, pa kada su naišli pored katoličke crkve, civilima se obratio [REDACTED] riječima „Vidite ovu crkvu, ovako Hrvati uvode Srbe u crkvu i pale, šta mislite da i mi vas uvedemo i zapalimo!“, nakon čega su izvršili razdvajanje muškarca od žena i djece, te je ženama i djeci naređeno da se vrate kući, da bi nakon toga iz grupe preostalih muškaraca izdvojili [REDACTED], te ih doveli na lokalno groblje u Vrbanjcima, gdje su im prvo naredili da iskopaju jednu jamu, pa kada je došao traktor u groblje, u tu jamu su navedeni civili istovarili tijela ubijenih NN lica koja su bila natovarena na traktor, a potom su pripadnici Specijalnog odreda milicije CSB Banja Luka i vojnici pucajući iz vatrenog oružja ubili 15 civila i to [REDACTED], od kada posmrtni ostaci ubijenih civila nisu nikada pronađeni i vode se kao nestala lica, osim posmrtnih ostataka ubijenog [REDACTED] čiji posmrtni ostaci su pronađeni na lokalitetu mezarja džamije Mali harem 2002. godine i ukopani na mjesnom groblju u Vrbanjcima, dok su prema muškarcima koji su ostali ispred benzinske pumpe, među kojima su bili [REDACTED]

[REDACTED] i drugi muškarci civili, postupali nečovječno tako što su im naredili da uđu u podrum benzinske pumpe koja je bila u izgradnji, a koji podrum je bio poplavljen vodom, a zatim im naredili da legnu u tu vodu, tako su ih prisilili da leže oko 15 minuta, nakon čega su ih izveli iz ovog podruma, gdje je jedan NN naoružani pripadnik srpskih jedinica od [REDACTED] oduzeo 9.000 DEM koje je [REDACTED] imao kod sebe, a pripadnici Specijalnog odreda milicije CSB Banja Luka i vojnici su toj grupi pridružili i nezakonito uhapšene civile iz sela Rujevica i to [REDACTED] - lice mlade životne dobi, nakon čega su ih sproveli u kuću vlasništvo [REDACTED] u Vrbanjima, gdje su ih zatvorili u jednu prostoriju dimenzija 4x4 metra, da bi ujutro pripadnici Specijalnog odreda milicije CSB Banja Luka i vojnici iz ove grupe izdvojili [REDACTED], a preostale muškarce civile su kamionom sproveli i zatvorili u općinski zatvor koji se nalazio iza zgrade Osnovnog suda u Kotor Varoši, pri čemu su na ulazu u zatvor i kroz hodnik zavora, morali proći kroz „špalir“ pripadnika Specijalnog odreda milicije CSB Banja Luka i vojnika dug oko 30 metara, i kojom prilikom su ih pripadnici Specijalnog odreda milicije CSB Banja Luka i vojnici udarali palicama, cjepanicama, metalnim šipkama po čitavom tijelu, što je kod nezakonito zarobljenih civila prouzrokovalo fizičku i psihičku bol;

14. Dana 06.07.1992. godine, u večernjim satima, u gradu Kotor Varošu, pripadnici Specijalnog odreda milicije CSB Banja Luka su se dovezli do kuće vlasništvo [REDACTED], u kojoj su se nalazili braća [REDACTED], a zatim su im naredili da izađu iz kuće, te ih odvezli do ugostiteljskog objekta „Menza“, u blizini spomenika iz Drugog svjetskog rata u užem dijelu Kotor Varoši, izveli ih iz vozila i odmah iz vatrenog oružja počeli pucati u njihovom pravcu kojom prilikom su ubili [REDACTED], dok su [REDACTED] ranili u obje ruke i koji je uspio pobjeći;
15. Dana 06.07.1992. u Kotor Varoši od strane pripadnika Specijalnog odreda milicije CSB Banja Luka uhapšen je [REDACTED] i priveden u prostorije PS Kotor Varoš, u stanici je zadržan nekoliko dana i svakodnevno je ispitivan od **Samardžija Zdravka** i drugih NN lica te je tučen od strane pripadnika Specijalnog odreda milicije CSB Banja Luka na način da je morao da podigne ruke uza zid držeći tri prsta i prislonjen uza zid dok su ga udarali pripadnici Specijalnog odreda milicije CSB Banja Luka, nakon čega je zatvoren u prostoriju u PS Kotor Varoš sa ukupno 20-ak civila među kojima je bio i [REDACTED], izjesni [REDACTED] i civili hrvatske nacionalnosti iz naselja Čepak i Kotorište, a zatim je [REDACTED] prebačen u samicu gdje je ostao četiri (4) dana sa [REDACTED] koji su fizički zlostavljani od strane pripadnika Specijalnog odreda milicije CSB Banja Luka, a potom su [REDACTED] prebačeni u OŠ „24 april“ u salu osnovne škole gdje su već bili zatvoreni civili hrvatske nacionalnosti iz naselja Kotor i Čepak i tu su držani oko mjesec dana, svaku noć u salu su ulazili pripadnici Specijalnog odreda milicije CSB Banja Luka i vojnici koji su tukli zatvorenike;
16. Dana 07.07.1992. godine, u naselju Čepak - općina Kotor Varoš, pripadnici Specijalnog odreda milicije CSB Banja Luka su napali selo, i:
 - a. zarobili oko 15 civila hrvatske i bošnjačke nacionalnosti, a zatim ih odveli i zatvorili u PS Kotor Varoš, a u zatvoru ih je bilo 17 do 20 civila zatvorenih među kojima dodatno i dvojica braće prezimena [REDACTED].

- b. svi ovi zarobljeni civili su svakodnevno fizički zlostavljani od strane pripadnika Specijalnog odreda milicije CSB Banja Luka, i nanosili im ozbiljne fizičke i psihičke povrede dok nisu nakon dan ili dva prebačeni i zatvoreni u OŠ „24. april“;
17. Dana 07.07.1992. godine, u Kotor Varoši, pripadnici Specijalnog odreda milicije:
- nezakonito su lišili slobode [REDACTED] i zatvorili ga u prostorije SJB Kotor Varoš,
 - u prostoriju SJB Kotor Varoš su ušla dva pripadnika Specijalnog odreda policije, koji su [REDACTED] tukli rukama, nogama, drvenom palicom, a zatim su isti u prostoriju uveli [REDACTED] koje su takođe pretukli, da bi taj drugi pripadnik Specijalnog odreda milicije staklom na leđima [REDACTED] urezao krst sa četiri (4) slova „S“, a nakon izvjesnog vremena premlaćivanja u prostoriju je ušao **Samardžija Zdravko** i istima naredio da prekinu sa premlaćivanjem, jer mu [REDACTED] treba živ, a zatim prilikom ispitivanja ta dva pripadnika Specijalnog odreda milicije su ponovo premlatili [REDACTED], prilikom čega ga je jedan od njih udario sa metalnom cijevi u glavu nakon čega je on [REDACTED] izgubio svijest;
18. Dana 11.07.1992. godine, u jutarnjim satima u selu Večići - općina Kotor Varoš, pripadnici Specijalnog odreda milicije CSB Banja Luka i pripadnici srpske vojske izvršili su pješadijski napad na stanovnike ovog sela bošnjačke nacionalnosti, kojom prilikom su pripadnici Specijalnog odreda milicije CSB Banja Luka i pripadnici srpske vojske:
- ušli u selo Večići, te zauzeli dio sela u kom se nalazila improvizirana bolnica koja se nalazila u magazinu kuće [REDACTED] u Hibića sokaku, gdje su pripadnici Specijalnog odreda milicije CSB Banja Luka u bolnici ubili ranjenike [REDACTED], a onda su pucajući iz vatrenog oružja ubili više civila među kojima i [REDACTED], te su po izlasku iz sela pucali u stariju ženu [REDACTED] jer nije mogla da hoda i koja je umrla od posljedica ranjavanja nakon par dana,
 - pripadnici Specijalnog odreda milicije CSB Banja Luka su nakon zauzimanja dijela sela Večići došli do kuće [REDACTED], a zatim su zapalili kuću vlasništvo [REDACTED] i susjedne kuće, a zatim su zapalili kuće [REDACTED];
 - pripadnici Specijalnog odreda milicije CSB Banja Luka su nakon zauzimanja dijela sela Večići iz podruma kuće [REDACTED] izveli su civile koji su se tu krili a među njima i [REDACTED], a zatim su ih odveli do mjesta u selu gdje su bili već dovedeni i drugi civili žene i djeca, a potom su ove zarobljene civile, koje u međuvremenu nisu ubili, povelili sa sobom kao živi štit, odnosno oko 30 žena i djece, te su ih vodili u živom štitu kako bi izašli iz sela;
 - a nakon povlačenja iz sela pripadnici Specijalnog odreda milicije CSB Banja Luka su navedenih oko 30 žena i djece doveli u Vrbanjce gdje su ih zatvorili u kafiću [REDACTED], a narednog dana, 12.07.1992. godine, vojnici su sve zatočene civile iz ugostiteljskog objekta [REDACTED] odveli u selo Orahova;
19. Dana 25.07.1992. godine pripadnici jedinice Specijalnog odreda milicije CSB Banja Luka, uz podršku pripadnika SJB Kotor Varoš, izvršili su ponovni napad na naselja Kotor i Kukavica kao i na zaselak Zabrđe kojom prilikom su, uz pomoć živog štita od civila Bošnjaka i Hrvata, ušli u ovo područje, a zatim izvršili masovni pokolj nad civilnim stanovništvom i zarobljenicima bošnjačke i hrvatske nacionalnosti, te su ubili [REDACTED]

[REDACTED], a nakon ubistva [REDACTED], [REDACTED] je mrtvom

odsjekao glavu;

20. Od 11.06.1992. godine, pa do kraja 1993. godine, u Kotor Varošu, Krizni štab, odnosno kasnije Ratno predsjedništvo je u koordinaciji sa vojskom i policijom Kotor Varoši organizovalo dva zatočenička centra u gradu, koja su obezbjeđivali pripadnici SJB Kotor Varoš, a u koja su najmanje do kraja augusta 1992. godine pripadnici Specijalnog odreda milicije CSB Banja Luka, pripadnici 22. Lpbr. VRS, i pripadnici TO Kotor Varoš dovodili uhapšene civile, zatvarali ih, držali u nehumanim uvjetima i vršili fizička zlostavljanja s ciljem iznuđivanja informacija i zastrašivanja nad istima i ubistva, pa su tako:


- a. U fiskulturnoj sali OŠ "24 april - Bratstvo i jedinstvo", u Kotor Varošu, oko dva mjeseca nezakonito držani zatvoreni civili koji su u salu svakodnevno dovodili pripadnici Specijalnog odreda milicije CSB Banja Luka među kojima je bio i [REDACTED], i pripadnici vojske gdje je bilo zatvoreno najmanje 50 civila bošnjačke i hrvatske nacionalnosti, među kojima i:

[REDACTED]

[REDACTED] i drugi zatvorenici, za svo vrijeme dok su bili zatvoreni, u salu su ulazili pripadnici Specijalnog odreda milicije CSB Banja Luka među kojima i [REDACTED], pripadnici 2. bataljana 22. Lpbr. VRS i pripadnici TO Kotor Varoš koja se kasnije pretvara u 1. Laku Kotorvarošku brigadu VRS, koji su u više navrata fizički zlostavljali zatvorene civile tako što su ih izvodili iz sale, prisiljavali da se okrenu licem prema zidu, udarali su ih rukama, nogama i puškama, a u Sali prisiljavali su zatvorenike da podižu tri prsta u zrak i tada su ih udarali, prisiljavali ih da se međusobno udaraju, pri čemu su držani nečovječnim uslovima u Sali, gdje nije bilo higijenskih uslova, spavali su na parketu, nuždu su obavljali u kantama, izglednjivanji zbog nedovoljne ishrane, često dobijali pokvarenu hranu, odvođeni su na prinudne radove kopanja rovova, čišćenje spavaonica i pušaka, a nikome od zatočenika nije ukazivana medicinska pomoć, što je sve kod zatvorenika izazivalo snažne fizičke i psihičke bolove i patnje;

- b. u zatvoru koji se nalazio iza zgrade Osnovnog suda u Kotor Varošu, nezakonito su držani zatvoreni više desetina civila bošnjačke i hrvatske nacionalnosti, među kojima su bili:

[REDACTED]



i drugi zatvorenici, uslovi života u zatvoru su bili loši, ćelije su bile prenatrane zbog čega zatvorenici nisu mogli leći niti spavati, na podu je bio parket bez prostirke ili pokrivača, izgladnjivani su jer su samo jednom dnevno dobijali hranu koja je često bila pokvarena, u toku noći nisu mogli izlaziti van ćelija pa su nuždu vršili u ćeliji gdje su bili zatvoreni, nikome nije ukazivana medicinska pomoć, bili su prisiljavani da pjevaju „četničke“ pjesme, izvođeni su na prinudne radove i to cijepanje drva, čišćenje ulica, uređivanje ulica i slično, s ciljem zastraživanja su fizički zlostavljani na način da su dobivali udarce po čitavom tijelu, od čega u zatvoru smrtno podlegli zatvorenici [REDACTED] dok je od fizičkog zlostavljanja u zatvoru [REDACTED] smrtno podlegao nakon što je iz zatvora pušten na slobodu, jednom prilikom su pripadnici Specijalnog odreda milicije CSB Banja Luka iz zatvora izveli zatvorenike [REDACTED], nakon čega su ih pripadnici Specijalnog odreda milicije CSB Banja Luka doveli na obalu rijeke Vrbanje gdje su ih pucanjem iz vatrenog oružja lišili života,

21. U periodu od 11.06.1992. pa najmanje do kraja augusta 1992. godine, na području opštine Kotor Varoš, pripadnici Specijalnog odreda milicije CSB Banja Luka, pripadnici 22. Lpbr. VRS, TO Kotor Varoš – kasnije 1. Lake Kotorvaroške brigade su, za vrijeme rata u BiH, suprotno pravilima međunarodnog prava i to odredbama člana 16.¹ Dopunskog protokola uz Ženevske konvencije od 12. augusta 1947. godine o zaštiti žrtava nemeđunarodnih oružanih sukoba iz 1977. godine (Protokol II) i odredbama člana 1.², 4.³ i 19.⁴ Konvencije za zaštitu kulturnih dobara u slučaju oružanog sukoba iz 1954. godine, koje odredbe su ujedno i međunarodno običajno pravo, paljenjem, eksplozijom, ispaljivanjem artiljerijskih projektila ili pješadijskim oružjem vršili uništavanje historijskih, kulturnih i vjerskih objekata i spomenika, pa je tako:
- dana 12.6.1992. godine uništena džamija u Hrvaćanima;
 - u julu 1992. godine uništene su “Nova” i “Stara” džamija u Večićima;
 - dana 01.07.1992. godine je zapaljena, a u avgustu 1993. godine uništena Župna crkva „Rođenja Marijina“ u centru Kotor Varoši, izgrađena 1891. godine;
 - u julu 1992. godine je zapaljena i minirana džamija u Vrbanjcima, izgrađena 1909. godine;
 - u julu 1992. godine je uništena Katolička filijalna crkva u Bilicama;
 - tokom 1992. godine je uništena “Čaršijska džamija“ u Kotor Varošu, izgrađena 1885. godine;
 - tokom 1992. godine je teškom artiljerijom uništena Katolička filijalna crkva sv. Ilije Proroka u naselju Jakotina;
 - tokom 1992. godine je uništena do temelja Sultan Fatih Mehmedova džamija, sagrađena 1832. godine;
 - tokom ljeta 1992. godine je uništena Katolička filijalna crkva, u Plitskoj;
 - tokom 1992. godine je djelimično uništena i opljačkana Katolička filijalna crkva sv. Ante Padovanskog, u naselju Šibovi;
 - tokom 1992. godine je djelimično uništena Župna crkva „Uznešenja Blažene Djevice Marije“, u naselju Sokoline, izgrađena 1873. godine;
 - tokom ljeta 1992. godine je uništena Turbeta Trojice Braće, u Večićima;
 - u julu 1992. godine je uništena Vranička džamija, u naselju Vranić, izgrađena 1886. godine;
 - u ljeto 1992. godine je uništena Župna crkva sv. Franje Asiškog u Vrbanjcima;
 - tokom 1992. godine je djelimično uništena Katolička filijalna crkva sv. Leopolda Mandića, u naselju Zabrde;
 - u julu 1992. godine je uništena Džamija u Hadrovcima, zaselak Gornji Hadrovci;
22. U periodu od 11.06.1992. godine, pa najmanje do kraja augusta 1992. godine, Krizni štab, a kasnije Ratno predsjedništvo opštine Kotor Varoš, na čelu sa [REDACTED], u koordinaciji i sadejstvu sa aktivnostima 2. bataljona 22. Lpbr. VRS, TO Kotor Varoš – kasnije 1. Lakom Kotorvaroškom brigadom, Specijalnom jedinicom policije CSB Banja Luka i SJB Kotor Varoš, organizovao i sprovodio masovna iseljavanja i deportacije nesrpskog civilnog stanovništva sa

¹ Član 16. Zaštita kulturnih objekata i hramova: Ne dirajući u odredbe Haške konvencije za zaštitu kulturnih dobara u slučaju oružanog sukoba od 14. maja 1954. godine, zabranjeno je vršiti bilo kakve neprijateljske akte uperene protiv istorijskih spomenika, umetničkih dela ili hramova koji predstavljaju kulturno ili duhovno nasleđe naroda, kao i koristiti ih za podršku vojnih akcija.

² Član 1. Definicija kulturnih dobara: U smislu ove Konvencije, kulturnim dobrima se, bez obzira na njihovo porijeklo ili njihovog vlasnika, smatraju: a) ... nepokretna dobra od velikog značaja za baštinu naroda, kao što su ... historijski spomenici, bilo vjerski ili svjetovni; ...

³ Član 4. Poštovanje kulturnih dobara: 1. Visoke ugovorne strane obavezuju se da će poštovati kulturna dobra smještena na vlastitoj teritoriji, kao i na teritoriji ostalih visokih ugovornih strana, ... suzdržavajući se od ikakvog neprijateljskog čina prema tim dobrima.

⁴ Član 19. Sukobi koji nemaju međunarodni karakter: 1. U slučaju oružanog sukoba koji nema međunarodni karakter i koji izbije na teritoriji neke od visokih ugovornih stranaka, svaka od strana u sukobu dužna je primjenjivati najmanje one odredbe ove Konvencije koje se odnose na poštovanje kulturnih dobara.

područja opštine na područja pod kontrolom Armije Republike Bosne i Hercegovine, u najvećem broju slučajeva na područje opštine Travnik, na način da je Krizni štab osnovao Agenciju za preseljenje stanovništva, preko Kriznog štaba i štaba Civilne zaštite su organizovani prevozi autobusima, lica koja su napuštala teritoriju su bila dužna da u Opštini Kotor Varoš potpišu izjave da se odriču svoje imovine u korist Srpske opštine Kotor Varoš, te su bili dužni platiti određeni novčani iznos kako bi napustili opštinu, a u pratnji autobusa kojima su građani napuštali opštinu bili su pripadnici srpske vojske i policije, na koji način je opštinu pod prisliom napustilo najmanje 1.000 građana nesrpske nacionalnosti;

Dakle:

u okviru širokog i sistematičnog napada usmjerenog protiv civilnog stanovništva opštine Kotor Varoš, znajući za napad i svjestan da njegove radnje predstavljaju dio tog napada, kao učesnik udruženog zločinačkog poduhvata u cilju trajnog uklanjanja cjelokupnog bošnjačkog i hrvatskog stanovništva sa područja opštine Kotor Varoš izvršio progon na nacionalnoj i vjerskoj osnovi i to zatvaranjem ili drugim teškim oduzimanjem fizičke slobode suprotno osnovnim pravilima međunarodnog prava, mučenjem, silovanjem, drugim nečovječnim djelima slične prirode učenjenim u namjeri nanošenja velike patnje ili ozbiljne fizičke ili psihičke povrede ili narušenja zdravlja, ubistvima, deportacijom i prisilnim preseljenjem stanovništva, protupravnim, samovoljnim i vojnim potrebama neopravdanim uništavanjem imovine u velikim razmjerama, te uništavanjem kulturnih, historijskih i religijskih spomenika,

Čime je:

počinio krivično djelo "Zločini protiv čovječnosti" iz člana 172. stav 1. h) (progon) u vezi sa članom 29. (saizvršilaštvo) i članom 180. stav 1. Krivičnog zakona Bosne i Hercegovine, a u vezi sa:

- tačkom a) (ubistva) u odnosu na tačke 4, 5, 8, 9.c, 9.d, 9.f, 10, 11, 13, 14, 18.a, 19, 20.b;
- tačkom d) (deportacija i prisilno preseljenje) u odnosu na tačku 22;
- tačkom e) (zatvaranje i drugo teško oduzimanje fizičke slobode suprotno osnovnim pravilima međunarodnog prava) u odnosu na tačke 1.a, 3.a., 5, 6.a, 8, 9.a, 12.a, 13, 15, 16.a, 17.a, 18.d, 20.a i 20.b;
- tačkom f) (mučenje) u odnosu na tačke 8., 9.e i 17.b;
- tačkom g) (prisiljavanje druge osobe na seksualni odnos ili s njim izjednačenu seksualnu radnju (silovanje)) u odnosu na tačku 3.c;
- tačkom k) (druga nečovječna djela slične prirode, učinjena u namjeri nanošenja velike patnje ili ozbiljne fizičke ili psihičke povrede ili narušenja zdravlja) u odnosu na tačke 1.b, 2, 3.b, 6.b, 7, 12.b, 13, 15, 16.b, 20.a, 20.b;
- tačkom i) (prisilni nestanak osoba) u odnosu na tačku 9.g,
- članom 173. stav 1. tačka f) KZBiH (ratni zločin protiv civilnog stanovništva – protupravno, samovoljno i vojnim potrebama neopravdano uništavanje imovine u velikim razmjerama) u odnosu na tačku 4, 9.b, 13. i 18.b;
- članom 173. stav 1. tačka e) KZBiH (ratni zločin protiv civilnog stanovništva – uzimanje talaca,) u odnosu na tačku 18.c;
- članom 183. stav 1. KZBiH (uništavanje kulturnih, historijskih i religijskih spomenika) u odnosu na tačku 21.

Na osnovu odredbe člana 35. stav 2. tačka k), a u vezi sa članom 126. ZKP BiH, podnosim

PRIJEDLOG ZA ODREĐIVANJE MJERA ZABRANE

Prema osumnjičenom:

- **Samardžija Zdravko**, ostali podaci kao u optužnici:
- zbog osnovane sumnje da je počinio krivično djelo “Zločini protiv čovječnosti” iz člana 172. stav 1. h) (progon) u vezi sa članom 29. (saizvršilaštvo) i članom 180. stav 1. Krivičnog zakona Bosne i Hercegovine, a u vezi sa tačkama a, d, e, f, g, k istog člana, zatim članom 173. stav 1. tačka f) KZBiH i članom 183. stav 1. KZBiH.
- i zbog postojanja razloga iz člana 126. stav 1. i 2. te člana 126.a. stav 1. tačka c) ZKP BiH,

predlažem da Sudija za prethodno saslušanje donese Rješenje kojim će osumnjičenom **izreći mjere zabrane** i to:

- a. Zabrana napuštanja boravišta - područja grada Banja Luka, bez prethodnog odobrenja Suda, osim u slučaju potrebe pojavljivanja pred Sudom u ovom krivičnom postupku ili po pozivu Tužilaštva BiH;
- b. Zabrana putovanja iz Banja Luke osim u slučaju potrebe pojavljivanja pred Sudom ili Tužilaštvom BiH i po odobrenju Suda, u okviru koje se kao dodatna mjera naređuje privremeno oduzimanje putnih isprava uz zabranu izdavanja novih putnih isprava, kao i zabranu korištenja lične karte za prelazak državne granice Bosne i Hercegovine, i
- c. Zabranu sastajanja sa osobama koje su saslušane kao svjedoci (navedeni u optužnici), te se osumnjičeni ne smije približiti svjedocima na udaljenost manju od 30 metara.

Obrazloženje

Tužilaštvo BiH je po okončanju istrage podiglo optužnicu protiv osumnjičenog **Samardžija Zdravka** zbog osnovane sumnje da je počinio krivično djelo “Zločini protiv čovječnosti” iz člana 172. stav 1. h) (progon) u vezi sa članom 29. (saizvršilaštvo) i članom 180. stav 1. Krivičnog zakona Bosne i Hercegovine, a u vezi sa tačkama a, d, e, f, g, k istog člana, zatim članom 173. stav 1. tačka f) KZBiH i članom 183. stav 1. KZBiH.

Iz prikupljenih dokaza koje Tužilaštvo dostavlja uz optužnicu, te uz koju se podnosi i ovaj Prijedlog za određivanje mjera zabrane, proizilazi postojanje osnovane sumnje da je osumnjičeni počinili predmetna krivična djela na način opisana u optužnici. U fazi postupka kada se dostavlja optužnica na potvrđivanje, te da je osumnjičen ispitan u svojstvu osumnjičenog na okolnosti ovih krivičnog djela u prisustvu svog branioca, Tužilaštvo ukazuje da je osumnjičeni sada potpuno svjestan svog procesnopravnog položaja jer su konkretizovane optužbe koje mu se stavljaju na teret. Osumnjičeni je svjestan težine krivičnog djela za koje se tereti, odnosno da se za ovo krivično djelo može izreći dugogodišnja kazna zatvora ili kazna dugotrajnog zatvora, zbog čega je osumnjičeni nesporno motivisan da bjekstvom pokuša izbjeći vođenje i okončanje ovog krivičnog postupka. Iz tih razloga postoji opasnost od ometanja postupka, koja je po mišljenju Tužilaštva izražena, ali se svrha može postići ne isključivo pritvorom, nego i mjerama zaštite koje su predložene. Osumnjičeni je svjestan da bijegom u inostranstvo može u najmanju ruku za sebe pribaviti pogodnosti odlaganja i ometanja postupka u BiH. U praksi Suda BiH, a i sudova u entitetima koji sude predmete ratnih zločina, poznato je da postoji već niz predmeta u kojima su osumnjičeni za predmete ratnih zločina pobjegli u susjedne

države kako bi izbjegli krivični postupak u BiH. U smislu postojanja opasnosti od bjekstva Tužilaštvo posebno ukazuje na sljedeće okolnosti koje se tiču osumnjičenog, a koje opravdavaju određivanje mjera zabrane napuštanje boravišta i zabrana putovanja:

- osumnjičeni pored državljanstva BiH ima i državljanstvo Republike Srbije
- osumnjičeni često prelazi državnu granicu BiH
- osumnjičeni je osoba koja je tokom rata, na koji period se i odnose optužbe, obavljao visoke vojne i civilne funkcije, pa zaključujemo da se radi osobi koja ima širok krug poznanstava i kontakata, što mu proširuje mogućnosti bjekstva.
- osumnjičeni je svjestan da bijegom u inostranstvo može u najmanju ruku za sebe pribaviti pogodnosti odlaganja i ometanja postupka u BiH,
- u praksi Suda BiH, a i sudova u entitetima koji sude predmete ratnih zločina, je poznato da postoji već niz predmeta u kojima su osumnjičeni za predmete ratnih zločina pobjegli u susjedne države kako bi izbjegli krivični postupak u BiH.

U cilju osiguranja efikasne kontrole poštivanja ove mjere zabrane od strane osumnjičenog, predlažemo da Sud odredi da nadležna Policijska uprava u mjestu boravišta osumnjičenog vrši nasumične kontrole poštivanja mjera zabrane i to najmanje jedanput sedmično, te da u slučaju da se utvrdi da on ne poštuje predložene mjere zabrane o tome obavijeste Sud, odnosno Tužilaštvo.

Tužilaštvo BiH predlaže da se osumnjičenom privremeno oduzmu sve važeće putne isprave uz zabranu izdavanja novih putnih isprava, kao i zabrana korištenja lične karte za prelazak državne granice Bosne i Hercegovine.

Pored toga, Tužilaštvo smatra da u konkretnom slučaju postoje okolnosti koje ukazuju na određeni stepen opasnosti od ometanja istrage, odnosno da i dalje postoje okolnosti koje ukazuju na potrebu zaštite krivičnog postupka od uticaja na svjedoke od strane osumnjičenog. Osnovana sumnja se u konkretnom slučaju zasniva na iskazima neposrednih očevidaca predmetnih inkriminacija za koje je izvjesno da će se pojaviti na glavnom pretresu kao jedni od ključnih svjedoka. Iako su svjedoci saslušani u istrazi, isti će morati dati svoj iskaz i neposredno na glavnom pretresu. Osumnjičeni su sada upoznati sa imenima svjedoka i sadržajem iskaza svjedoka koji ga terete, pri čemu treba uzeti u obzir i težinu krivičnog djela za koje se osumnjičeni tereti, posebno okolnost da se za ovo djelo može izreći dugogodišnja zatvorska kazna ili kazna dugotrajnog zatvora. Osim toga važno je ukazati i da su većina najznačajnijih svjedoka njegovi poznanici, komšije, a neki su i bivše radne kolege i saborci, te da osumnjičeni živi u istom mjestu prebivališta kao mnogi svjedoci, te postoji osnovana bojazan od uticaja na svjedoke. Također, neophodno je da se osumnjičenim zabrani sastajanje sa oštećenim u ovom predmetu, kao i ostalim svjedocima koji su svjedočili u ovom predmetu na okolnosti koje se osumnjičenom stavljaju na teret.

U cilju osiguranja efikasne kontrole poštivanja ove mjere zabrane od strane osumnjičenih, predlažemo da Sud odredi da nadležna Policijska uprava u mjestu boravišta osumnjičenog, vrši nasumične kontrole poštivanja mjera zabrane, te da u slučaju da se utvrdi da on ne poštuje predložene mjere zabrane, o tome obavijeste Sud, odnosno Tužilaštvo. Također Tužilaštvo BiH predlaže da Sud BiH dostavi Rješenje kojim se izriče mjera zabrane napuštanja boravišta i organu koji izvršava mjeru, odnosno policijskoj upravi u Banja Luci, kao i da Rješenje kojim se izriče mjera zabrane putovanja dostavi i graničnoj policiji, a privremeno oduzimanje putnih isprava uz zabranu izdavanja novih putnih

isprava, kao i izvršenje zabrane korištenja lične karte za prelazak državne granice da se odredi da se unese u Glavni centar za obradu podataka.

Obzirom na sve navedeno, smatramo da izložene okolnosti u potpunosti opravdavaju određivanje predloženih mjera zabrane, pa a u cilju otklanjanja bojazni da bi osumnjičeni mogao ometati vođenje krivičnog postupka, predlažemo da se istim odrede mjere zabrane kao u ovom prijedlogu, te smatramo da su predložene mjere adekvatne i da će uz odgovarajuću kontrolu postići svrhu zbog koje se predlažu, do okončanja glavnog pretresa uz redovnu dvomjesečnu kontrolu u skladu sa odredbama ZKP BiH.

Tužilac Tužilaštva BiH:
